

石湖居士詩集

一



序

予疇昔之晨與客坐堂上遙見一健步黃衣負一笈至
庭下呼而誦其奚自曰自參政公范氏也發其笈公之
文集在焉索其書讀之則公之子莘叩頭請曰莘不天
不自實越而先公一夕奄忽棄其孤莘欲死而不敢者
有先公付託之重任在方先公之疾而未病也日夜手
編其詩文數年成集凡若干卷逮將易篋執莘手而授
之且曰吾集不可以無序篇有序篇非序篇寧無序篇
也今四海文字之友惟江西楊誠齋與吾好且我知微
斯人疇可以屬斯事小子識之若莘則何敢請而先公
之治命不敢墜惟先生哀而諾之子執書抱遺編而泣

曰萬里與公同年進士也公先進至爲朝廷大臣與天子論道發政坐廟堂進退百官而萬里環堵荒寒之士也何敢與公友公不我薄陋而辱友之萬里不敢拒公亦不敢以執政俟公也今忍死丁寧之託其何敢辭初公以文學材氣受知壽皇自致大用至杖漢節使強虜即其庭伏穹廬不肯起袖出私書切責之君臣大驚有自階闥之嬖竊位樞臣者其勢方震赫公沮之竟不奉詔而去其所立又有不凡者矣若夫劇心於山水風月之場彫龍於言語文章之囿此吾輩羈窮酸寒無聊不平之音也公何必能此哉古語曰爭名者必於朝爭利者必於市是二人者使之以此易彼或以彼易此二人

者其肯乎哉非不肯也不願也非不願也亦各樂其樂也詩人文士挾其所樂足以敵王公大人之所樂不啻也猶將愈之故王公大人無以傲夫士而士亦無所折於王公大人今公乃自屏其所可樂而復力爭夫士之所甚樂所謂不虞君之涉吾地者其不多取乎然公之詩文非能工也不能不工耳公風神英邁意氣傾倒拔新領異之談登峰造極之理蕭然如晉宋間人物他人夏夏吃吃而不能出諸口者公曠呻噫欠之間粹然談笑而道之則其詩文之工豈十日一水五日一石之謂也哉甚矣文之難也長於臺閣之體者或短於山林之味諧於時世之嗜者或漓於古雅之風牋奏與記序異曲

五七與千百不同調非文之難兼之者難也至於公訓
誥具西漢之爾雅賦篇有杜牧之之刻深騷詞得楚人
之幽婉序山水則柳子厚傳任俠則太史遷至於詩大
篇決流短章斂芒緝而不釀縮而不僭清新嫵麗奄有
鮑謝奔逸雋偉窮追太白求其隻字之陳陳一倡之鳴
鳴而不可得也今海內詩人不過三四而公皆過之無
不及者予於詩豈敢以千里畏人者而於公獨斂衽焉
於是文士詩人之難者易偏者兼矣其不盛矣乎嘻人
琴今俱亡矣廣陵散今此聲遂絕矣惠子不生莊子不
死復何道哉公之別墅曰石湖山水之勝東南絕境也
壽皇嘗爲書兩大字以揭之故號石湖居士云公諱成

大字至能世爲姑蘇人其世次言行職官則有少保大
觀文大丞相益公周公之銘詩在紹熙五年六月十一
日誠齋野客楊萬里謹序

八字至拾壹爲故種入其世以言其種之類也

序

石湖居士范公待制敷文閣來帥成都兼制置成都潼川利夔四道成都地大人衆事已十倍他鎮而四道大抵皆帶蠻夷且北控秦隴所以臨制捍防一失其宜皆足致變故於呼吸顧盼之間以是幕府率窮日夜力理文書應期會而故時巨公大人亦或不得少休及公之至也定規模信命令施利惠農選將治兵未數月聲震四境歲復大登幕府益無事公時從其屬及四方之賓客飲酒賦詩公素以詩名一代故落紙墨未及燥士女萬人已更傳誦被之樂府弦歌或題寫素屏團扇更相贈遺蓋自蜀置帥守以來未有也或曰公之自桂林入

蜀也舟車鞍馬之間有詩百餘篇號西征小集尤雋偉
蜀人未有見者盍請於公以傳屢請而公不可彌年乃
僅得之於是相與刻之而屬游爲序淳熙三年上巳日
朝奉郎成都府路安撫司參議官兼四川制置使司參
議官山陰陸游序

宋史本傳

范成大字致能吳郡人紹興二十四年擢進士第授戶曹監和劑局隆興元年遷正字累遷著作佐郎除吏部郎官言者論其超躡罷奉祠起知處州陛對論力之所及者三曰日力曰國力曰天力今盡以虛文耗之上嘉納處民以爭役囂訟成大爲勑義役隨家貧富輸金買田助當役者甲乙論第至二十年民便之其後入奏言及此詔頒其法於諸路處多山田梁天監中詹南二司馬作通濟堰在松陽遂昌之間激漢水四十里溉田二十萬畝堰歲久壞成大訪故迹疊石築防置堤闕四十所立水則上中下溉灌有序民食其利除禮部員外

郎兼崇政殿說書乾道令以絹計贓估價輕而論罪重成大奏承平時絹匹不及千錢而估價過倍紹興初年遞增五分為錢三千足今絹實貴當倍時直上驚曰是陷民深文遂增為四千而刑輕矣隆興再講和失定受書之禮上嘗悔之遷成大起居郎假資政殿大學士充金祈請國信使圖書專求陵寢蓋泛使也上面諭受書事成大乞并載書中不從金返使者慕成大名至求中憤效之至燕山密章奏具言受書式懷之入初進國書詞氣慷慨金君臣方傾聽成大忽奏曰兩朝既為叔姪而受書禮未稱臣有疏措笏出之金主大駭曰此豈獻書處耶左右以笏標起之成大屹不動必欲書達既而

歸館所金主遣伴使宣旨取奏成大之未起也金庭紛
然太子欲殺成大越王止之竟得全節而歸除中書舍
人初上書崔實政論賜輔臣成大奏曰御書政論意在
飭綱紀振積敝而近日大理議刑遞加一等此非以嚴
致平乃酷也上稱爲知言張說除簽書樞密院事成大
當制留詞頭七日不下又上疏言之說命竟寢知靜江
府廣西窘匱專藉鹽利漕臣盡取之於是屬邑有增價
抑配之敝詔復行鈔鹽漕司拘鈔錢均給所部而錢不
時至成大入境曰利害有大於此乎奏疏謂能裁抑漕
司強取之數以寬郡縣則科抑可禁止從之數年廣州
鹽商上書乞復令客販宰相可其說成大出銀錢助之

人多以爲非下有司議卒不易成大說舊法馬以四尺三寸爲限詔加至四寸以上成大謂互市四十年不宜驟改除敷文閣待制四川制置使疏言吐蕃青羌兩犯黎州而

結蕃列等尤桀黠輕視中國臣當教閱將兵外修堡砦仍講明教閱團結之法使人自爲戰三者非財不可上賜度牒錢四十萬緡成大謂西南諸邊黎爲要地增戰兵五千奏置都監路分吐蕃入寇之路十有八悉築柵分戍

結擾安靜砦發飛山軍千人赴之料其三日必遁已而果然白水砦將王文才私娶蠻女常導之寇邊成大重賞檄羣蠻使相疑貳俄禽文才以獻即斬之蜀北邊舊有義士三萬本民兵也監司郡

守雜役之都統司又俾與大軍更成成大力具其不可
詔遵舊法蜀知名士孫松壽年六十餘樊漢廣甫五十
九皆挂冠不仕表其節詔召之皆不起蜀士由是歸心
凡人才可用者悉致幕下用所長不拘小節其傑然者
露章薦之往往顯於朝位至二府召對除權吏部尚書
拜參知政事兩月爲言者所論奉祠起知明州奏罷海
物之獻除端明殿學士尋帥金陵會歲旱奏移軍儲米
二十萬賑飢民減租米五萬水賊徐五竊發號靜江大
將軍捕而戮之以病請閒進資政殿學士再領洞霄宮
紹興二年加大學士四年薨成大素有文名尤工於詩
上嘗命陳俊卿擇文士掌內制俊卿以成大及張震對

自號石湖有石湖集攬轡錄桂海虞衡集行於世

石湖居士詩集目次

嗣協迂客

吳郡

顧嗣臯漢魚

重訂

嗣立俠君

卷一

詩四十六首

卷二

詩五十四首

卷三

詩六十三首

卷四

詩六十七首

卷五

詩五十一首

卷六

詩四十三首

卷七

詩四十九首

卷八

詩五十二首

卷九

詩五十一首

卷十八十四首

詩五十九首

卷十一

詩六十五首

卷十二

詩七十二首

卷十三

詩四十四首

卷十四

詩五十四首

卷十五

詩六十九首

卷十六

詩六十五首

卷十七

詩六十九首

卷十八

詩六十首

卷十九

詩五十二首

卷二十

詩八十四首

卷二十一

詩六十首

卷二十二

詩四十二首

卷二十三

詩七十二首

卷二十四

詩七十首

卷二十五

詩六十三首

卷二十六

詩五十六首

卷二十七

詩七十九首

卷二十八

詩七十五首

卷二十九

詩五十首

卷三十

詩三十三首

卷三十一

詩五十一首

卷三十二

此卷詩亦不以其是平聲風賦其賦

詩五十七首

自文懸公至今四百首皆平聲

卷三十三

韻本五言前今相次皆詩音集以詩

詩三十九首

故開之以對如也相韻楚韻一

卷三十四

詞出

賦六首

其間詩字或長重本行

楚辭四首

其詩集以公詩同世

卷三十五

詞出

詞

其詞同會說出吾文全平亦

石湖詩集三十三卷凡古今各體詩一千九百一

十六首范文穆公手自編定宋嘉泰間其子莘等

刻以行世合詩文凡百有三十卷明時曾已重刻而流傳頗少又有活板印本殘闕甚多今藏書家多有抄本而訛舛異同魯魚錯出吾友金子亦陶所藏從宋板抄得更爲廣集諸家較勘精密可稱善本茲先刻其詩集以公諸同好卷帙前後悉依原本所編其間譌字如井聖木刊之悞聖爲聖第靡波流之悞第爲弟皆略爲改正所有一二漶漫之處無從辨證姑闕之以俟攷外附賦楚辭一卷樂府一卷賦本在詩前今附於詩後者集以詩名從其類也嗟乎自文穆公至今四百有餘年矣而詩篇在是聲光爛然亦可以見吳下之風流其淵

源至今弗絕也康熙戊辰八月中秋前一日依園
主人謹識

石湖居士詩集目次終

石湖居士詩集卷一

嗣協迂客

吳郡

顧嗣臯漢魚

重訂

行路難

嗣立俠君

贈君以丹棘忘憂之草青棠合歡之花馬腦遊仙之夢
枕龍綜辟寒之寶紗天河未翻月未落夜長如年引春
酌昔人安在空城郭今夕不飲何時樂

西江有單鵠行

西江有單鵠託身萬里雲猥爲稻梁謀墮此鷗鷺羣朝
遊楓葉杪暮宿蘆花根懷安浦澍暖忘記雲海寬忽有

孤征鴻驚飛落江濱眼明見黃鵠解后傾情真羽毛雖
不同意氣頗相親言鵠有六翮何不高飛翔水鳥不足
羣朝暮徒嘲喧相將乘風去一上盤秋旻渴飲顛露滋
飢吸晴霞噉方知翺翎俊可以凌埃塵東風昨解凍春
光暖如薰陽鳥當北鄉行止倏已分儻欲相逐去關山
隔吳秦兩鳥竟分飛鳴聲動行人豈不有歲晚鴻當復
來賓但愁山海闊岐路多糾紛復來失故道那得相知
聞鴻歸有儔侶鵠住長悲辛

車遥遥篇

車遥遥馬憧憧君遊東山東復東安得奮飛逐西風願
我如星君如月夜夜流光相皎潔月暫晦星常明留明

待月復三五共盈盈

放魚行

水落塘枯魚臥陸小兒抱取不濡足昂藏赤鯁亦垂頭
背負玄鱗三十六家人滌砧不辭勞云有素書金錯刀
嗟予贖放豈徼福忍把汝命供吾饗如今已脫張胡子
好上龍門飲湖水不然崛起載飛仙切莫顛狂稱長史

晚步東郊

水墨依林寺青黃負郭田斜陽猶滿地片月早中天策
策鴉飛急冥冥樹影圓西山元自好那更著雲煙

元夜憶羣從

愁裏仍蒿徑閒中更華門青燈聊自照濁酒爲誰溫隙

月知無夢窓梅寄斷魂遙憐好兄弟飄泊兩江村

登西樓

少年豪氣合摧鋒青鬢朱顏萬事慵疇昔四愁無夢到
及時一笑有誰供詩情飲興如雲薄草色花光似酒醲
千里春心吟不盡下樓分付晚煙鐘

不寐

南風釀卑濕滑滑病履舄竟日隱几坐拳局不得適丹
田恍瀕洞銀海眩眊黑髀弱類跨鞍臂強如運甓合體
競酸嘶莫夜輒增極奏牀不得眠耿耿到明發黃妳共
住久來夢乃其職睡魔吾故人曩是不速客招呼各偃
蹇莫効尺寸力周公無由來咫尺今古隔彭尸不得去

罌騎無行色主客兩愁緒虛室浪生白人言老禪師兩
脇不到席茲事恐未暇但願了今夕平生北窓眠相相
即聖域睡僊吾所慕行步亦軒息

河豚歎

鯁生藜藿腸食事一飽足腥腐色所難況乃衷醜毒彭
亨強名魚殺氣孕慘黷既非養生具宜謝砧几酷吳儂
真差事網索不遺育捐生決下箸縮手汗童僕朝來里
中子饒吻不待熟濃睡喚不應已落新鬼錄百年三寸
咽水陸富肴藪一物不登俎未負將軍腹爲口忘計身
饕死何足哭作俑者誰與至今走末俗或云先王意除
惡如菽菽逆梟與毒獍歲歲參幣玉芟夷入薦羞蓋欲

殲種族生死有定數斷命烏可續適丁是時者未易一
理局寵鼎子公怒羊羹華元劔異味古所珍無事苦畏
縮駢頭訖此語戒諭祇取瀆聾盲死不悟明知諒已燭
續長恨歌七首

金杯激灩曉粧寒國色天香勝牡丹白鳳詔書來已暮
六宮鉛粉半春闌

紫薇金屋閉春陽石竹山花却自芳莫道故情無覓處
領巾猶有隔生香

聞道蓬壺重見時瘦來全不耐風吹無端却作塵間念
已被仙官聖得知

別後相思夢亦難東虛雲路海漫漫仙凡頓隔銀屏影

不似當時取次看

人似飛花去不歸
蘭昌宮殿幾斜暉
百年只有雲容姊
留得當時舊舞衣

驪山六十二高樓
突兀華清最上頭
玉羽川長湘浦暗
三郎無事更神遊

帝鄉雲馭若爲留
八景三清好在不
玉笛不隨雙鶴去
人間猶得聽梁州

雷雨鄰舍起龍

雨工避事欲蟠泥
帝遣豐隆執以歸
連鼓一聲人失箸
不知挂壁幾梭飛

次韻唐致遠雨後喜涼

石月詩長本

愛汝堂

老陽作氣再三衰，鼓竭之餘不支。
雨塞旗，拔幟埽迹空。
一點新涼破殘暑，飛蚊薨薨已無奇。
蜻蜓翅淨，摩天嬉。
竹窓日暮轉蕭瑟，喜有促織鳴聲悲。

秋日二絕

碧蘆青柳不宜霜，染作滄洲一帶黃。
莫把江山誇北客，冷雲寒水更荒涼。

新秋病骨頓成衰，不度溪橋半月來。
無事閉門非左計，饒渠屐齒上青苔。

窓前木芙蓉

辛苦孤花破小寒，花心應似客心酸。
更憑青女留連得，未作愁紅怨綠看。

嘲里人新婚

冷艷頰容一笑開
休將鸞扇更徘徊
筵篔細寫歸舟字
彷彿遊仙夢裏來

過松江

長虹斗起蛟龍穴
朱碧欄干夜明滅
太湖三萬六千頃
多少清風與明月
青鷁驚飛白鷺閒
丹楓未老黃蘆折
誰將橫笛叫蒼煙
無限驚波翻白雪
洞庭林屋舊遊處
玉柱金庭路巉絕
水仙逢迎摻脩袂
問我歸計何當決
去年匹馬元春寒
今此孤篷窘秋熱
人生意氣得失間
輕重劔頭吹一吷
莫將塵土浣朱顏
却待丹砂回白髮

過平望

寸碧闌高浪孤墟明夕陽水柳搖病綠霜蒲蘼新黃孤
嶼乍舉網蒼煙忽鳴榔波明荇葉顫風熟蘋花香雞犬
各村落蓴鱸近江鄉野寺對客起樓陰濯滄浪古來離
別地清詩斷人腸亭前舊時水還照兩鴛鴦

長安閭

斗門貯淨練懸板淙驚雷黃沙古岸轉白屋飛檐開是
間表丈許舳艫蔽川來千車擁孤隧萬馬盤一坏篙尾
亂若雨檣竿束如堆摧摧勢排軋洶洶聲喧逐偈仄復
偈仄誰肯少徘徊傳呼津吏至弊蓋凌高埃囁嚅議譏
征叫怒不可裁吾觀舟中子一一皆可哀大爲聲利驅
小者飢寒催古今共來往所得隨飛灰我乃疇於人胡

爲乎來哉

榮木 并序

卧病十日綠陰滿庭因誦淵明榮木詩其序曰日月
推遷已復有夏總角聞道白首無成犁然有感乃和
其韻

薰風南來木榮於茲木榮幾時黃落從之逝其須臾坐
成四時今我不學殆其已而天旋地遊日月其根形息
氣徂不亡者存去鄉離家莫肯過門猗歟先師不我疵
陋褰衣示珠俾我復舊自我來歸十年不富孰蠹孰蠹
惟汝自疚冉冉榮木霜華將墜天黑路長屹蹶可畏隸
也不力奚取六驥脂車着鞭一息而至

兩木并序

壬申五月卧病北窓惟庭柯相對手植綠橘枇杷森
然出屋枇杷已著子橘獨十年不花各賦一詩

枇杷昔所嗜不問甘與酸黃泥裹餘核散擲籬落間春
風折勾萌樸檄如榛菅一株獨成長蒼然齊屋山去年
小試花瓏瓏犯冰寒化成黃金彈同登桃李盤大鈞播
羣物斡旋不作難樹老人何堪挽鏡覓朱顏頷髭爾許
長大笑敬巾冠

綠橘生西山得自髯翁家云此接活根是歲當著花俛
仰乃十霜垂蠹紛相遮芳意竟寂莫枯枝謾槎牙風土
諒非宜翁言豈予夸會令返故山高深謝汗邪石液滋

舊根山英擢新葩黃團挂霜實大如崆峒瓜當有四老人來駐七香車

道中

月冷吟蛩草湖平宿鷺沙客愁無錦字鄉信有燈花蹤跡隨風葉程途犯斗槎君看枝上鵲薄暮亦還家

落鴻

落鴻聲裏怨關山淚濕秋衣不肯乾只道一番新雨過誰知雙袖倚樓寒

題山水橫看二首

煙山漠漠水漫漫老柳知秋渡口寒盡是西溪腸斷處憑君將與故人看

霜入丹楓白葦林橫煙平遠暮江深君看鴈落帆飛處
知我秋風故國心

瑞香花

萬粒叢芳破雪殘曲房深院閉春寒紫紫青青雲錦被
百疊薰籠晚不翻酒惡休拈花藥嗅花氣醉人釀勝酒
大將香供惱幽禪恰在蘭枯梅落後

讀史

登壇策劉項卧廬料曹孫探懷取事業一一如印圈英
豪蓋天資八極入控搏由來事成毀只繫手覆翻玉虹
朝貫日劔氣夜燭天雖欲避功名何處蟄龍鸞我生後
千載愚暗難具言長大但食粟閔凶不能文麥豆已難

辨楣稅固不分抱瓮灌圃畦截竿避城門智略類如此
何以超籬籓龜剗始神筴木斷方犧尊朝市有機穿冠
裳或鉗髻茲事定不重吾其老泥蟠敢云善用短聊復
強自寬

浙江小磯春日

客裏無人共一杯故園桃李爲誰開春潮不管天涯恨
更捲西興暮雨來

代聖集贈別

一曲悲歌水倒流尊前何計緩千憂事如夢斷無尋處
人似春歸挽不留草色粘天鷓鴣恨雨聲連曉鷓鴣愁
迢迢綠浦帆飛遠今夜新晴獨倚樓

二月三日登樓有懷金陵宣城諸友

百尺西樓十二欄日遲花影對人間春風已入片時夢
寒食從今數日間折柳故情多望斷落梅新曲與愁關
詩成欲訪江南便千里煙波萬疊山

寒食郊行書事二首

野店垂楊步荒祠苦竹叢鷺窺蘆箔水鳥啄紙錢風媪
引濃粧女兒扶爛醉翁深村時節好應爲去年豐
隴麥欣欣綠山桃寂寂紅帆邊漁蕪浪木末酒旗風信
步隨芳草迷途問小童賞心添脚力呼渡過溪東

初夏二首

清晨出郭更登臺不見餘春只麼回桑葉露枝蠶向老

菜花成莢蝶猶來
晴絲千尺挽韶光
百舌無聲燕子忙
永日屋頭槐影暗
微風扇裏麥花香

夏夜

脉脉惜佳夜
泠泠成浩歌
儻無詩句子
將奈月明何
露氣濛花重
風聲入樹多
清歡殊未辦
桂影墮江波

與時敘現老納涼池上時敘誦新詞甚工

會心不在遠
頃步便得之
長風吹月來
清影落半池
屋頭見木葉
玲瓏剪琉璃
紅塵絆兩足
大笑兒輩癡
老禪挽我遊
高論方軒眉
潘郎忽鼎來
談詩解人頤
晚誦雲髻篇
濯濯餘春姿
想見篇中人
清潤如君詩
笑我兩枯

木獨與三冬期

林元復輓詩

胸次崢嶸滿貯書十年名字滿江湖張公閱世詩千首
揚子傳家宅一區謾道春風須得意那知秋雨不成珠
自從雪魄冰魂散魯國今誰更服儒

戲贈少梁

屈膝銅鋪畫掩關薰爐誰伴夕香寒秋來合有相思字
會待風前片葉看

南徐道中

以下赴金陵漕試作

生憎行路與心違又逐孤帆擘浪飛吳岫湧雲穿望眼
楚江浮月冷征衣長歌悲似垂垂淚短夢紛如草草歸

若有一廬供閉戶肯將篋舫換柴扉

石湖居士詩集卷一

卷前一臺海關文前錄藏神錄茶報

石湖居士詩集卷二

望金陵行闕

聖代規模跨六朝行宮臺殿壓金鰲
三山落日青鸞近雙闕清風紫鳳高
石虎蹲江蟠王氣玉麟湧地鎮神臯
太平不用千尋鎖靜聽西城打夜濤

金陵道中

山晚黃羊隨日下天寒白犢弄風歸
愁埃百轉西州路笑憶沙湖一棹飛

曉行官塘驛

篝燈驛吏喚人行寥落星河向五更
馬上誰驚千里夢石頭岡下小車聲

秦淮

不將行李試間關誰信江湖道路難
腸斷秦淮三百曲船頭終日見方山

重九獨登賞心亭

誰教佳節滯天涯強展愁眉管物華
每歲有詩題白鴈今年無酒對黃花
悠悠造化占斜日草草登臨記落霞
宇宙此身元是客不須彈缺更思家

賞心亭再題

天險東南重兵雄百二尊拂雲千雉繞
截水萬崖奔赤日吳波動蒼煙楚樹昏
向無形勝地何以控乾坤

宿義林院

暝氣昏如雨禪房冷似冰竹間東嶺月松杪上方燈驚
鶻盤金刹流螢拂玉繩明朝窮脚力連夜斬崖藤
不似荊公墓二首

百歲誰人巧拙一丘底處虧成半世青苗法意當年雪
竹詩情上五題來

本意治功徒木何心黨禍揚塵報讎豈教行劫作俑翻
成害仁

十月朔客建業不得與兄弟上冢之列悲感成

謝道容詩不親聞日日歡云具於園心許西風之雨

歲已看成暮身今未得歸風塵孤淚盡霜露寸心違南
碣新流水西山舊落暉煙松應好在宿草定成非逝水

方東去浮雲浪北飛危魂先自斷不待更沾衣

白鷺亭

倦遊客舍不勝閒日日清江見倚闌少待西風吹雨過
更從二水看淮山

臙脂井三首

昭光殿下起樓臺拚得山河付酒杯春色已從金井去
月華空上石頭來

午醉醒來一夢非忽忽玉樹逐春歸臙脂却作千年計
不似愁魂四散飛

腰支旅拒更神遊桃葉山前水自流三十六書都莫恨
煩將歌舞過揚州

秦淮 并序

自金陵復泛秦淮宛轉數百曲世傳始皇東巡自江
乘渡望氣者以爲金陵有天子氣乃鑿長岡引潮水
入焉號曰秦淮逶迤屈曲不類人功故又傳爲龍所
開也

祖龍驅羣龍疏此萬丈溝雨工戀故樓十步九回頭至
今秦淮曲宛若春蛇遊舟師厭回互歎息倚拖樓維昔
東巡初入極圍寸眸天端有佳氣鬱鬱東南浮卜云當
興王在後五百秋叱咤召六丁慘淡風雲愁鑿渠斷地
脉自謂神與謀乾坤有端倪已露不可收大帝開吳天
定鼎臨江陬融融秣陵日始照十二旂經營暨六代茲

地稱神州乃知歷數定昧者徒私憂茲事故老傳未知
信然不姑置勿重陳作詩歎遲留

九月三日宿胥口始聞鴈

以下歸崑山作

故人久不見乍見雜悲喜新鴈如故人一聲驚我起把
酒不能觴送目問行李曾雲行路難空濛千萬里塞北
多關山江南渺雲水風高吹汝瘦旅伴今餘幾斜行不
少駐滅沒蒼煙裏羈遊吾亦倦客程殊未已扁舟費年
華短纜繫沙尾物生各有役冥心聽行止江郊匝地熟
場圃平如砥歸期且勿念共飽豐年米

欲雪

烏鴉撩亂舞黃雲樓上飛花已唾人說與江梅須早計

馮夷無賴欲爭春

讀史三首

百歲虧成費械機
烏鳶螻蟻竟同歸
一檠燈火挑明滅
兩眼昏花管是非
堂堂列傳冠元功
紙上浮雲萬事空
我若材堪當世用
他年應只似諸公
鏤冰琢雪戰毛釐
画餅聲名骨朽時
汗簡書青已兒戲
峴山辛苦更沉碑

宴坐菴四首

油燈已暗忽微明
石鼎將乾尚有聲
衲被蒙頭籠兩袖
藜牀無地著功名

五更風竹鬧軒窓聽作江船浪隱牀枕上翻身尋斷夢
故人待漏滿鞞霜

粥魚吼罷鼓逢逢卧聽飢廳上曉釭一點斜光明紙帳
悟知檐雀已穿窓

跣趺合眼是無何靜裏惟聞鳥雀多俗客叩門稱問字
又煩居士起穿鞞

青青礪上松送致遠入官

青青礪上松鬱鬱礪底柏松森上曾雲柏踟抱幽石偃
植雖不同臭味乃相得千霜與百雪偶立衆芳側衆芳
豈不好歲晏埽無迹廣廈罩羣木萬牛挽山澤松材可
世用攀援入王國草木豈有情亦復念離析君看此翠

柏錯莫無顏色孤陰愁月夜獨籟怨風夕蒼官何當歸
相望長相憶

除夜感懷

松楸百年哀霜露終歲悲天地豈汝偏鬼神諒無私孤
窮罪當爾我今怨尤誰噎絕夢自語伶俜影相隨豈無
一經傳政坐五鬼嗤鑿杓共齟齬榛荆費耘耔付畀踰
丘山奉承劣毫釐生男九族歡所願作門楣時命有大
謬生男竟何裨匏瓜謾枵腹蒲柳無真姿蹙縮高顴頰
蕭騷短髯髭貧病老歲月斗杓坐成移曉風淒以寒簾
幕相紛披月星炯我冠霧雨泫我衣焄蒿奉祠事苦淚
落酒卮逝者日已遠生者日以衰羸驂駕九折日暮抱

長飢岐路正夔絕耿耿誰當知

次韻唐子光席上賞梅

玉枝橫斜照清空纖手撚香

公水部無人廣平去

後來我輩猶情鍾誰噴昭華送愁絕叫雲三弄怨斜月
徑須踏雪問前村莫待馬蹄如踣鐵春風壓盡百花橋
尊前仍有董嬌嬈惜無楚客歌成雪空有蕭郎眼似刀

夜行上沙見梅記東坡作詩招魂之句

玉妃謫人世乃在流水村天風吹嬋娟飄墮寂莫濱芳
心怨命薄玉色淒路塵佳人來無期日暮多碧雲溪聲
爲咽絕月亦低微擲相逢倦遊子一笑不復珍脉脉問
不語亭亭意彌真要我冰雪句招此欲斷魂蘇仙上賓

天妙意終難陳璿柄忽傾墮曉嵐愁翠昏

次韻唐子光教授河豚

世間尤物美惡并江鄉未用誇吳羹清宮洞房寒熱媒
深山大澤龍蛇生胡夷信美胎殺氣不奈吳兒苦知味
楊花欲動荻芽肥汙手死心搖食指食魚要是黃梁
古來不必須河魴君看嗔腹似渾脫寧肯滑甘隨芥薑
先生法語峻立壁譏評不使一錢直膨亨從此迹如埽
坐令梅老詩無力懸知仙骨有青冥風香久已滌羶腥
大笑日華解毒法何如肘後餐霞經

題如夢堂壁

勃姑午啼喚雨鴨鳩曉轉留春片雲不載歸夢兩鬢全

供客塵

曉起

簾額繡波蕩漾燭盤紅淚闌干夢裏五更風急愁邊一
半春殘

再遊上方

僧共老花俱在客將春鴈同回范叔一寒如此劉郎前
度曾來

即事

醉袖籠鞭轉柳塘青門芳樹掩殘香誰驚翡翠雙飛去
祇有蓮花對斷腸

春晚即事

屋頭清樾暗荆扉紫萼爛斑翠莢肥春晚軒窓人獨困
日長籬落燕雙飛

春晚三首

陰陰垂柳閉朱門一曲闌干一斷魂手把青梅春已去
滿城風雨怕黃昏

客去鉤窓詠小詩遊絲撩亂柳花稀微風盡日吹芳草
蝴蝶雙雙貼地飛

夕陽槐影上簾鉤一枕清風夢昔遊夢見錢塘春盡處
碧桃花謝水西流

樂先生闢新堂以待芍藥醑醑作詩奉贈

芍藥有國色醑醑乃天香二妙絕世立百草爲不芳先

生絕俗姿風味本無雙年來悟結習欲試安心方天魔
巧伺便作計迴剛腸多情開此花艷絕溫柔鄉道人爲
一笑正爾未易忘呼童葺荷芷擇勝開軒窓啼鶯不愁
思遊蜂亦猖狂百年顰呻頃共此過隙光朝爲春條綠
暮爲秋葉黃把翫尚無幾況以憂愁妨願言秉燭遊迨
此春宵長

題城山晚對軒壁

一枕清風夢綠蘿人間隨處是南柯也知睡足當歸去
不奈溪山留客何

題城山挂月堂壁

百疊煙鬟得眼明坐來心跡喜雙清秋陽滿地西風起

猶有啼鶯四五聲

姑惡 并序

姑惡水禽以其聲得名世傳姑虐其婦婦死所化東坡詩云姑惡姑惡姑不惡妾命薄此句可以泣鬼余行茗嘗始聞其聲晝夜哀厲不絕客有惡之以爲此必子婦之不孝者予爲作後姑惡詩

姑惡婦所云恐是婦偏辭姑言婦惡定有之婦言姑惡未可知姑不惡婦不死與人作婦亦大難已死人言尚如此

大暑舟行含山道中雨驟至霆奔龍挂可駭

隕雲暖前驅連鼓訶後殿鬣鬣失高丘擾擾暗古縣白

龍起幽蟄黑霧佐神變
盆傾耳雙聵斗暗目四眩
帆重腹逾飽櫓潤鳴更健
圓漪暈雨點濺滴走波面
伶俜愁孤鴛颺閃亂飢燕
麥老枕水卧秧穉與風戰
牛蹊岌城沉蟻隧洶瓠建
水車競施行歲事敢休宴
咿啞嘯簧鳴輾轉連鎖轉
駢頭立婦子列舍望宗伴
東枯駭西潰寸涸驚尺澱
嗟余豈能賢與彼亦何辨
扁舟風露熟半世江湖徧
不知憂稼穡但解加餐飯
遙憐老農苦敢厭遊子倦

題畫卷五首

鑿落秋水石明高
樞老柳兩灘橫
君看疊巘雲容變
又有中宵雨意生

歌傾棧路繞山明
隔隴人家犬吠聲
無限白雲堆去路
不知誰識許宣平

春陰十日溪頭暗
夜半西風雨脚收
但覺奔霆吼空谷
遙知萬壑正爭流

暑雲潑墨送驚雷
坐見前山驟雨來
今夜一涼千萬里
更無焦卷與塵埃

秋晚黃蘆斷岸
江南野水連天
天色微明魚網
鴈行飛入蒼煙

六月七日夜起坐殿廡取涼

畏暑中夜起出門
月露清晶爇卧銀
漢錯落低玉繩
網戶閉妙香石樓
棲古燈風從何處
來殿閣微涼生桂
旗

儼不動藻井生上征榱楣共突兀鬼物相枝撐彭觥鐵
拄杖磔磔棲燕驚俗人豈解事鼻息春雷鳴大星送曉
來四窓炯微明顥氣澡肌骨相相兩腋輕乘風欲歸去
驂鸞紅青冥却恐方平知浪得狡獪名

中秋卧病呈同社

人間佳風月浩浩滿大千俗子不解愛我乃知其天以
此有盡姿翫彼無窮妍受用能幾何北溟一杯然天公
尚齟齬不肯畀其全卧病窘詩料坐貧羞酒錢瓊樓與
金闕想像屋角邊如聞真率社勝遊若登仙四者自難
并造物豈我偏

秋日雜興六首

我友蓬蒿士却埽謝四鄰內無三尺童外無雙蒲輪豈
非騏驥姿執轡難其人無衣可御冬忍寒待陽春仰雲
發永歎夜作寒蟹呻參戶勸之起懷寶善自珍秋月耿
清夜秋風捲曾雲佳哉爲誰歎定爲我與君莫嫌酒味
薄聊復相歡欣

夕陽下桑柘餘暉挂西山西山在何許冉冉紫翠間綵
雲無朝昏綠蘿竟暄寒昔與霞上人同跨雙飛翰上凌
紫霄峰下弄白石湍風吹墮渺莽及此行路難佳人應
望予我豈真忘還

秋高氣彌清歲晏天雨霜繁枝各病綠況乃枝上香向
來不勝春渺在無何鄉樂極定自悲誰歎此更張春秋

無終窮榮落殊未央

媽媽芙蓉花秀出清霜晨衆卉已昨夢孤芳若爲新寒
蜂無佞飛一笑靜自珍誰令嬋娟姿墮此寂寞濱絕世
貴獨立後時莫酸辛回風佐小舞薄日生微醺即事亦
足樂何必桃李塵

蒼筠如蒼玉鄉是礪壑姿竭來西窓下死生付汙泥蟲
緣有病葉土瘦無新枝太陽豈我偏檐影爲蔽虧昔如
松柏獨今作蒲柳衰暮夜風雨急歲晏誰與歸

屋東雙梧桐婉婉無真姿朝爲春風條暮爲秋霜枝夜
久風葉鳴驚鵲一再飛梧桐不足愁會有明年期人老
真可歎寧復遊冶時

石湖居士詩集卷三

擬古

鸞環樓前月掩抑樓上人人月不得語相看兩凝顰西
窓回紋機織徧錦字春聊可自持翫何由將寄君

立春日郊行

竹擁溪橋麥蓋坡土牛行處亦笙歌麴塵欲暗垂垂柳
醅面初明淺淺波日滿縣前春市合潮平浦口暮帆多
春來不飲兼無句奈此金旛綵勝何

次韻漢卿舅即事二絕

風捲南枝一夜休孤芳寧肯爲人留淡粧素服真成夢
落月橫參各自愁

萬木垂垂欲改柯，根萌焦渴奈春何。
晚來礎汗南風壯，會有溪雲載雨過。

晚潮

東風吹雨晚潮生，疊鼓催船鏡裏行。
底事今年春漲小，去年曾與畫橋平。

一篙

一篙新綠浦東西，雪絮漫江鴈不飛。
宿雨纔晴風又轉，片帆那得及時歸。

碧瓦

碧瓦樓頭繡幙遮，赤欄橋外綠溪斜。
無風楊柳漫天絮，不雨棠梨滿地花。

題記事冊

庚午

劃破虛空一劒間
六根同轉上頭關
如今宴坐菴中事
政在凡夫道法間

暮春上塘道中

店舍無煙野水寒
競船人醉鼓闌珊
石門柳綠清明市
洞口桃紅上巳山
飛絮著人春共老
片雲將夢晚俱還
明朝遮日長安道
慚愧江湖釣手閒

江上

天色無情淡江聲不斷流
古人愁不盡留與後人愁

餘杭道中

落花流水淺深紅
盡日帆飛繡浪中
桑眼迷離應欠雨

麥鬚騷殺已禁風牛羊路杳千山合雞犬村深一徑通
五柳能消多許地客程何苦鎮怱怱

陳侍御園坐上

愁眼逢歡春水明詩情得酒春雲生花梢蝴蝶作團去
竹裏鶉鳩相對鳴邂逅浮生此日好纏綿俗累何時輕
擘牋沫墨乏竒句擲笛當筵慚妙聲

獨遊虎跑泉小菴

苔徑彎環入茅齋取次成蔓花綠壁起間草上堦生宿
雨松篁色新晴燕雀聲筒泉烹御米聊共老僧傾

王希武通判挽詞二首

當代名臣後惟公奕世賢及親三釜養遺子一經傳藥

石探竒字芸香緝斷編堂堂今不見塵迹自依然
事契從先世姻聯亦近親遽爲重壤去淒斷十年鄰物
理真飄忽家聲正隱麟門闌可三戟何止駟車云

劇暑

赫赫炎官張傘

赤帝駢龍安得雷轟九地會令雨

起千峰

次韻時敘

新春殘春一夢間夢中兀兀長閉關今朝出門春已去
但見新笋齊屋山作詩惜春聊復爾春亦何能與人事
閒心如絮久沾泥但愛日長添午睡

夜宴曲

以下共二
首效李賀

金麟噴香煙龍蟠玉燈九枝青闌干明瓊帶湘簾斑
風幃繡浪千飛鸞舞娥紫袖如弓彎雲中一笑天解顏
銜杯快卷玻璃乾花樓促箭春宵寒二十五聲宮點闌
神絃
雙娥一去三千秋粉篁春淚凝古愁神鼉悲鳴老龍怨
水爲翻瀾雲爲留素空逗露晚花泣神官行水鱗僮濕
潮聲不平江風急蒼梧冥茫九山立

樂神曲

以下共四
首效王建

豚蹄滿盤酒滿盃清風蕭蕭神欲來願神好來復好去
男兒拜迎女兒舞老翁翻香笑且言今年田家勝去年
去年解衣折租價今年有衣著祭社

繰絲行

小麥青青大麥黃原頭日出天色涼
姑婦相呼有忙事舍後煮繭門前香
繰車嘈嘈似風雨繭厚絲長無斷縷
今年那暇織絹著明日西門賣絲去

田家留客行

行人莫笑田家小門戶雖低堪洒掃
大兒繫驢桑樹邊小兒拂席軟勝氈
木臼新春雪花白急炊香飯來看客
好人入門百事宜今年不憂蠶麥遲

催租行

輸租得鈔官更催踉蹌里正敲門來
手持文書雜嗔喜我亦來營醉歸耳
牀頭慳囊大如拳撲破正有三百錢

不堪與君成一醉聊復償君草鞋費

緘口翁

張達夫大卿酒尊名酒尊不應緘口客令僕嘲之

君子取中道常在語默間多言固自費不語良獨難此翁身如鄭文淵辨如懸河思如泉邇來緘口欲挂壁囁嚅畏客翻可憐君不見東家玉壺本弟兄叩之猶解語分明願聞脛渾甚深義定自能令一座傾

春思

沙際綠蘋滿樓頭芳樹多光風入網戶羅幕生繡波前
年花開憶湘水今年花開淚如洗園樹傷心三見花依
舊銀屏夢千里

次韻漢卿舅臘梅二首

垂垂瘦萼泣微霜
剪剪纖英鎖暗香
金雀釵頭金蛺蝶
春風傳得舊宮粧
湘袂朝天紫錦裳
光風微度絳霄香
壽陽信美無仙骨
空把心情學澹粧

宿東寺二首

淡天如水霧如塵
殘雪和霜凍瓦鱗
織女無言千古恨
素娥有意十分春
一聲黃鵠夜深歸
栖雀驚鳴觸殿扉
北斗半垂樓閣外
風旛渾欲上雲飛

範老前歲相別約歸括蒼
便游四明今不知何
地暇日有懷

春色重來意未闌故人一去肯復還
括蒼洞天埽舊隱補陀海岸尋神山
杖屨雲煙遠遊樂衣裳風雪行路難
鴻飛冥冥鷗浩蕩安得置之雞鶩間

癸亥日泊舟吳會亭

去年春盤浙江驛湛湛清波動浮石
今年春盤吳會亭冥冥細雨濕高城
天邊作客風沙裏今年去年成老矣
客心古井冷無波過眼人情亦如水
憶昔三生住翠微偶來平地著征衣
山中故人應大笑扁舟坐穩何當歸
時敘火後意不釋然作詩解之

潘郎曉衾夢蘧蘧舞馬竟與融風俱
前驅炎官後熱屬席捲不貸淵明廬
淵明有詩君家十年四立壁震風凌雨

啼妻孥平生白眼蓋九州閉戶不納結駟車清貧往往
被鬼笑付與一炬相揶揄井堊木刊烏鼠緒汝則暫戲
吾何辜天闕悠悠虎豹怒叱閣上訴非良圖作詩聊復
相料理甑墮已破空踟躕浮生適來且適去況此茅屋
三間餘埽除劫灰得空闊新月恰上東牆隅幕天席地
正可樂爲君鼓旗助歌呼

題湯致遠運使所藏隆師四圖

欠伸

春風吹夢驀江飛行盡江南只片時深院無人自驚覺
夕陽芳樹乳鴉啼背立粧臺髻鬟懶鏡鸞應見茸茸眼
不須回首更嫣然劉郎已自無腸斷

不更回首倦繡

鴉兒弄煖綠苔走花氣薰人濃似酒困來如醉復如愁
不管低鬟釵燕溜無端心緒向天涯想見檣竿檣脚斜
槐陰忽到簾旌上遲却尋常一線花

倚竹

輕薄人情翻覆手冰容却耐幽居久關中舊事逐春休
付與新人莫回首目送斜陽忘却歸竹風搖曳翠羅衣
君看脉脉無言處中有杜陵飢客詩

嗅梅

雪意勒花愁未解背陰一朵寒先退東風還是去年香
不比人心容易改宿酒曹騰正耐春花枝人面兩時新

相看好作風流伴只恐花枝却妒人

晚步

排門簾幕夜香飄燈火人聲小市橋滿縣月明春意好
旗亭吹笛近元宵

題開元天寶遺事四首

御前羯鼓透春空笑覺花奴手未工一曲打開紅杏棗
須知天子是天公

謝蠻舞袖貴妃絃秦國如花虢國妍不賞纏頭三百萬
阿姨何處費金錢

朝天車馬詔頻催斲得新湯未敢開忽報豬龍掀宇宙
阿瞞虛讀相書來

剝啄延秋屋上烏明朝箭道入東都宮中亦有風流陣
不及漁陽突騎粗

讀甘露遺事二首

神理人情本不同絕憐鼠輩倖元功天公盍假毛鷲助
成敗都懸反掌中

上林輦路草青青誰向憑高識聖情謾展東封圖畫看
不如釀酒亂平生

半塘

以下二十首
城西道中

柳暗閭門逗曉開半塘塘下越溪回炊煙擁柁船船過
芳草綠堤步步來

醉春後楓橋

朱門白壁枕彎流桃李無言滿屋頭牆上浮圖路傍堦
送人南北管離愁

橫塘

南浦春來綠一川石橋朱塔兩依然年年送客橫塘路
細雨垂楊繫畫船

胥口

扁舟拍浪信西東何處孤帆萬里風一雨快晴雲放樹
兩山中斷水粘空

香山

吳王種
香處

採香徑裏木蘭舟嚼藥吹芳爛漫遊落日青山都好在
桑間蕎麥滿芳洲

上沙

水邊犬吠隔疎林籬落蕭森日半陰繁杏鎖紅春意淺
晚梅飄粉暮寒深

天平寺

以下天平山

舊遊彷彿記三年轟飲題詩夜滿山山上白雲應解笑

又將塵土浣朱顏

三年前至先兄與余同唐少梁登山絕頂比歸迷路捫蘿而下夜已午主

僧散遣羣童秉炬求余三人久而莫得以為已仙也是夜宿寺中聯句達曉東坡曰自從有此山白石封蒼苔何常有此樂將去復徘徊至今往來於余心

白雲泉

泉色正白蓋乳泉

龍頭高啄嗽飛流玉醴甘渾乳氣浮捫腹煮泉烹鬪勝

真成騎鶴上揚州

山頂

翠屏無路強攀緣
我與枯藤各半仙
不敢高聲天闕近
人間漠漠但寒煙

山徑

以下高景山

雲根新徑絡山腰
暗綠交陰宿露飄
行到竹深啼鳥鬧
鵲鳩老怨畫眉嬌

泉亭

收拾風煙鎖翠微
亂山窮處結巖扉
青天不盡鳥飛盡
吳楚川原似衲衣

金氏菴

菴廢無人居無

醉墨題窓側
暮鴉蔓藤緣
壁走青蛇
春深有燕捎
飛蝶

日暮無人埽落花

平雲閣

以下
南峰

背倚天峰湧化宮
橫空閣道拖雙虹
火雲六月應竒絕
青瑣玲瓏八面風

鐵錫

支道林
遺物

八環流韻寶枝鳴
古鐵無花紫翠明
莫遣閒人容易振
泉飛石落鬼寰驚

放鶴亭

亦道林
故事

石門關外古亭基
樹老藤枯野徑微
放鶴道人今不見
故應人與鶴俱飛

馬跡石

傳云道林騎白馬升天遺跡今石上雙
跡儼然類蹄泮者後人爲小塔識其處

跨馬凌空亦快哉
龍腰鶴背謾徘徊
遊人欲識仙蹤處
但覓蒼崖白塔來

金沙

沙中熬金燦然人或煉取多不成

莊嚴福地守靈仙
不爲人間計子錢
一掬爛熳光照眼
路傍饒隸枉流涎

龍母廟

以下澄照寺

孝龍分職隸湘西
天許寧親歲一歸
風雹春春損桃李
山中寒食尚冬衣

白蓮堂

古木參天護碧池
青錢弱葉戰連漪
忽忽遊子忽忽去
不見風清月冷時

白善坑

鑿山成井深數十丈復轉爲
隧道以取之危險不可逼視

銀鬚玉璞紫金精
犯難窮探亦有名
白堊區區土同價
吳儂無事亦輕生

石湖居士詩集卷三

待字賦歲一
賦以書香春詩

石湖居士詩集卷四

賀樂丈先生南郭新居

新堂燕雀喜竹籬挂藤蘿崩奔風濤裏得此巢龜荷西
山效爽氣南浦供清波會心不在遠容膝何須多先生
淮海俊踏地嘗兵戈飄飄萬里道芒屨厭關河風吹落
下邑楚語成吳歌豈不有故國荒垣鞠秋苾無庸說當
歸到處皆南柯卜遷不我遐一水明青羅閉戶長獨佳
奈客剥啄何會令蒼苔石屐齒如蜂窠

歲旱邑人禱第五羅漢得雨樂先生有詩次韻

海山之湫龍所宮濺瀑下赴聲琤琮碧矚大士何許主
愛此匹練飛冥濛偶然宴坐百千劫神力悲願俱無窮

向來火雲挾日走沙煎日爛千山童陸渾風高煽熱屬
涇川草肥間雨工萬口磬磬叫此士爐燎未吐誠先通
暮塵捲地羊角暗朝霞橫天魚尾紅商羊摩霄鳶起舞
居然一澍歌年豐人言佛陀入三昧斷取世界如旋蓬
指麾釋梵駿奔走況爾風伯并雷公風騷老將亦贊喜
筆陣獨埽詩壇空嗟余嘯咏不釋手一曲何啻歌三終

次韻時敘賦樂先生新居

愚士繁俗如囚奴至人遺形與化俱紛紜覺夢不可辨
蘧蘧相相知誰歟百年如泡亦如電剛欲鑄鐵充門樞
列仙之臞墮山澤一席三椽良有餘平生欽熾百戰勇
頓挫久已歸夷途光芒無用入詩句青天白日轟雷車

松煤繭紙妙揮埽芸香錦囊深貯儲紫露雙瓶春夜醉
黃雲一稜秋田租誰能搏扶北溟海政爾歸卧南陽廬
鴻飛冥冥隔雲雨弋人可慕不可呼

病中夜坐呈致遠

似霧如煙夜氣浮鶴鳴驚睡起搔頭含風竹影淡留月
著雨蛩聲深怨秋萬事心空癡已慣百骸歲晚病相投
便當採藥西山去脚力蹒跚怕遠游

戲題藥裹

捲却絲綸颺却竿莫隨魚鼈弄腥涎須知別有垂鈎處
枯海無風浪拍天

夜歸

竹輿伊軋走長街掠面風清醉夢迴曲巷無聲門戶閉
一燈猶照酒壚開

田舍

呼喚攜鋤至安排築圃忙兒童眠落葉鳥雀噪斜陽煙
火村聲遠林菁野氣香樂哉今歲事天末稻雲黃

戲題致遠書房

照叢菊靨萬黃金欹架薇條半綠陰逋客已隨丹鳳詔
但餘花草怨秋深

烏戍密印寺

烏戍即今之烏鎮
青堆今曰青鎮

青堆溪上水平堤

烏堆東岸
謂之青堆

絳瓦參差半掩扉

殿用純
紅瓦色

爛然我與聖公俱客寓

聖翁本汀州白衣巖主號定光佛
者連南夫知州載神像歸寄於寺

之藏前香
火蕭然

人傳帝子尚靈威

寺有昭明
太子祠

勝緣齟齬三重

障

東佛閣三造不成今据
見材取次成之猶殊勝

志士辛勤十載歸

鐘樓乃一
僧發心東

髮為商走川廣得錢二萬緡
凡十年復髡而歸樓始成

花木禪房都不見但餘蝙蝠

蝠畫羣飛

僧房皆為狹門深洞極
暗行百餘步不辨人

月夜泛舟新塘

溪上清風柳萬重綠煙無路月朦朧
船頭忽逐回塘轉
一水迢迢却向東

客舍

轂擊肩摩錦繡堆朝聲洶洶暮聲催
忽然憶起長橋路
天鏡無邊白鳥迴

病中夜坐

村巷秋春遠禪房夕磬深
飢蚊常繞髻暗鼠忽鳴琴
薄寒相中稜稜瘦不禁
時成洛下詠却似越人吟

秋芸有春綠

秋芸有春綠踈籬照孤芳
清霜早晚至何草能不黃
寧當念衰落政爾事容光
及時且自好來日殊未量

三湘怨

牙檣晝畫櫓搖漾三湘浦
佳人翔綠裾含顰爲誰舞
拳新荷葉愁絕煙水暮
風雲忽飄蕩隱約聞簫鼓

夜發崑山

歲寒人瑾戶霜重獨登舟
弱櫓搖孤夢踈蓬蓋百憂
但吟今不樂豈計幾宜休
慚愧沙湖月年年照薄遊

十一月十二日枕上曉作

竹響風成陣，窓明雪已花。
柴扉吟凍犬，紙瓦啄飢鴉。
宿酒欺寒力，新詩管歲華。
日高猶擁被，蓐食媿鄰家。

南樓望雪

夜月流瑤圃，春風滿玉都。
籬疎先剝落，樹密正模糊。
亂點橫煙鴈，驚啼失木烏。
醉魂方浩蕩，風袖不支梧。

除夜書懷

運斗寅杓轉，周天日御回。
夜從冬後短，春逐雨中來。
鬢綠看看雪，心丹念念灰。
有懷憐斷鴈，無思惜疎梅。
絮厚眼生纈，蔬寒腸轉雷。
燭花紅瑣碎，香霧碧徘徊。
昨夢書三篋，平生酒一杯。
牀頭新曆日，衣上舊塵埃。
搖落何堪

柳紛紜各夢槐隙光能幾許世事劇悠哉岐路東西變
羲娥日夜催頭顱元自覺懷抱故應開踴躍金何意青
黃木自灾身謀同斥鷃政爾願蒿萊

戲荅澹菴小偈

莫問前程事漂然海上舟命乖逢鬼國緣合遇蓬丘畢
竟非身計俱成錯路頭故鄉隨脚是流浪不知休

偶書

出處由人不繫天癡兒富貴更求仙東家就食西家宿
世事何緣得兩全

題立雪圖

堂下心如鐵菴中語似雷有人參此語三箇一坑埋

題日記

誰言萬事轉頭空未轉頭時亦夢中若向夢中尋夢覺
覺來還入大槐宮

題張氏新亭

水楊成幄翠相遮猶有東風管歲華葉底青梅無數子
梢頭紅杏不多花煩將鍊火炊香飯更引長泉煮鬪茶
約我詩成須疥壁莫嗔歌側似歸鴉

玉臺體

捲幔燈千朶鈎簾月半弓繡鴛翔瀝水金雀跂屏風細
意翻長袖多情結短封銅壺從婉婉玉珮正丁東

枕上

明月無聲滿屋梁
夢餘分影上人牀
素娥脉脉翻愁寂
付與風鈴語夜長

斑駁

斑駁別後月纖纖
門外疎桐影畫簾
留下可憐將不去
西風吹上兩眉尖

題傳記二首

莫將綵筆寄朝雲
紅淚羅巾隔路塵
說與東風無限恨
倩風吹斷去年春

綵舟歸去海山青
寂莫瑤臺月自明
啼雨落花春已盡
夢魂何必更多情

病中絕句八首

空裏情知不著花逢場將病當生涯蒲團軟暖無時節
夜聽蚊雷曉聽鴉
溽暑薰天地湧泉彎跼避濕挂行纏出門斟酌無忙事
睡過黃梅細雨天
石鼎颼颼夜煮湯亂拖芝朮鬪溫涼化兒幻我知何用
祇與人間試藥方

病中心境兩俱降猶憶江湖白鳥雙一夜雨聲鳴紙瓦
聽成飛雪打船窓

檐頭排溜密如簾溪上層陰定解嚴最是看山奇絕處
白雲堆絮擁青尖

夜合梢頭蘸紫茸菜葱頂上拆黃封去年團扇題詩處

依舊踈簾細雨中

盆傾瓴建夜翻渠繞屋蛙聲一倍粗想見西堂渾不睡

明朝踏濕看菖蒲

謂現老

晴色先從喜鵲知斜陽一抹照天西竹雞何物能無賴
如許泥深更苦啼

蘇與八病中三偈

擾擾隨流無定期波停浪息始應知一塵不偶同歸處
四海無親獨步時苦相打通俱入妙病緣纔入更何疑
霜清木落千山露笑殺東風葉滿枝

一交銷取萬黃金將病求醫在用心化盡此身成藥樹
不妨栽得病根深

莫把無言絕病根
病根深處是無言
丈夫解却維摩縛
八字轟開不二門

雲間湖光亭

微風不動斂濤湍
組練晶晶色界寒
斜照發揮猶未盡
月明殘夜更來看

高景菴泉亭

峰頭揮手笑紅塵
天入雙眸洗翳昏
萬里西風熟秔稻
白雲堆裏著黃雲

晚入盤門

人語嘲喧晚吹涼
萬窓燈火轉河塘
兩行碧柳籠官渡
一簇紅樓壓女牆
何處采菱聞度曲
誰家拜月認飄香

輕裘駿馬慵穿市困倚蒲團入睡鄉

九月三十日夜出關候致遠不至

風勁便輕棹霜嚴怯弊裘青山蟠巨浸紅樹立滄洲月
黑鴈猶去燈寒人更愁煙松漫小峴何處問鳴騶

次韻致遠自毘陵見寄二首

黃鵠高飛碧落寒向來山水夢驚殘故情若問元真子
依舊江頭把釣竿

新詞一闋話羈愁清似寒泉咽隴頭官下有誰同此
仲宣應是獨登樓

元日山寺

聽熟朝魚又暮鐘全將慵懶度三冬貪眠豹榻窓間日

怕擁馳裘陌上風登版自憐行蹭蹬讀碑仍怪視蒙籠
少年豪壯今如此略與殘僧氣味同

題記事冊

北山山下小菴居佛劫仙塵只故吾八萬四千空色界
不離一法認毘盧

寄贈致遠并呈現老

草草家風節物新從來憂病不憂貧琴書稍覺浮生誤
香火惟知此事真室裏談空思二士花間對影謾三人
祇愁盧李分攜後別有箜篌一曲春

春後微雪一宿而晴

綵勝金幡換物華垂垂天意晚平沙東君未破含春藥

青女先飛翦水花
夜逐回風鳴瓦壠
曉成踈雨滴檐牙
朝暎不與同雲便
烘作晴空萬縷霞

雪霽獨登南樓

雪晴風勁晚來冰
樓上竒寒病骨驚
雀啄空檐銀筍墮
鴉翻高樹玉塵傾
青帘閃閃千家靜
黃帽亭亭一水橫
坐久天容却溫麗
一彎新月對長庚

次時敘韻送至先兄赴調

梅柳欲動風作難
行人意在飛鴻間
一官遠遊門戶弱
百歲上策身心閒
胸次饒渠有廊廟
夢魂叵使無江山
栽桃種杏須付我
已辦鐵鎖遲公攀

上沙遇雨快涼

刮地風來健葛衣一涼便覺暑光低雲頭龍挂如垂筴
雨在中峰白塔西

自天平嶺過高景菴

卓筆峰前樹作圍天平嶺上石成關綠陰匝地無人過
落日秋蟬滿四山

高景山夜歸

伊軋籃輿草露間夜涼月暗走孱顏忽逢陂水明如鏡
照見沉沉倒影山

白雲嶺

路入千峰一線通陸離長劔立天風五年領客題詩處
正在孤雲亂石中

五
偃月泉

松風竹露午猶寒
知有龍蟠一掬慳
我欲今年來結夏
莫肩岫幌掩雲關

魏武代人七月十四日生朝

秋入壺中玉宇鮮
芝蘭桃李共熙然
已饒瑞莢明朝滿
先借清蟾一夜圓
北闕紫泥應道路
東山紅袖莫雲煙
如今且醉江湖酒
來歲城南尺五天

題金牛洞

洞在宣城之成山前此蕪廢無聞自魏公尚書發之常有笙簫仙音之瑞

故鄉江吳多好山
筍輿篋舫相窮年
春風吹入江南陌
疊障雙峰如舊識
聞道金牛更孱顏
古來鐵鎖高難攀
自從仙伯弭芝蓋
鳳舞鸞歌開洞天
新詩賸說山中妙

我不曾游先夢到從渠弱水隔蓬萊雲山何處無瑤草
曉自銀林至東灞登舟寄宣城親戚

曉山障望眼脉脉紫翠橫澄江已不見況乃江上城結
東治野裝木末浮三星羸馬隴頭嘶小車谷中鳴亭亭
東灞樹練練綠浦明篙師笑迎我新漲沒蘋汀徑投一
葉去雲水相與平聊將塵土面照此玻瓈清懷我二三
友高堂晨欲興風細桐葉墮露濃荷蓋傾凝香繞燕几
安知路傍情

讀唐太宗紀

平內難

官府相圖勢不收國家何有各身謀縱無管蔡當時例
業已彎弓肯罷休

弟兄相賊戮天倫自古無如舜苦辛掩井捐階危萬死
不聞親殺鼻亭神
佐命諸公趣夜襲爭言社稷要靈長就令昆季尸神器
未必唐家便破亡

建成回馬欲馳歸元吉行趨武德闈若使兩人俱得去
却於何處極兵威
嫡長承祧有大倫老公愛子本平均只知世上尋常理
爭信英雄解滅親

重讀唐太宗紀

立晉王

父子情深苦亦深蓋天神武一沾襟想當拔刃投牀際
也憶海池舟裏心

承乾謀父保天年青雀圖兄亦兩全隱刺諸兒却拏戮
一私知隔幾山淵

更張聊欲亢吾宗仁孝承家合至公天發殺機那可料
正投阿武禍胎中

石湖居士詩集卷四

公既以士稱其德四

王姓阿左縣中

更兼阿塔丘吾宗二本承家合至公天孫亦對陛下降
一序談關幾山際

承遺韓父給天年青金圖只亦兩全聖德諸兒法學場

石湖居士詩集卷五

復自姑蘇過宛陵至鄧步出陸

漿家饋食僅爲藩酒市停驂竹廡門紅樹亭亭棲晚照
黃茅杳杳被高原飲溪有跡於菟過掠草如飛扑渥翻
車軌如溝平地少飽帆天鏡憶江村

題南塘客舍

間裏方知得此生癡人身外更經營君看坐賈行商輩
誰復從容唱渭城

南塘冬夜倡和

燃萁烘煖夜窓幽時有新詩趣倡酬爲問灞橋風雪裏
何如田舍火爐頭寒釭欲暗吟方苦凍筆難驅字更遒

絕笑兒癡生活淡略無歲晚稻梁謀

游金牛洞題石壁上

仙翁舊游處琅瑯韻靈曲至今有餘音玄鶴舞幽谷衆
真期我住歲晚芝田熟腰鑿從翁來籥雲跨飛鹿

淨行寺傍皆圩田每爲潦漲所決民歲歲興築
患糧絕功輒不成

崩濤裂岸四三年落日寒煙正渺然空腹荷鋤那辨此
人功未至不關天

袞山道中

虎嘯狐鳴苦竹叢魂驚終日走蒙茸松林斷處前山缺
又見南湖數十峰

花山村舍

潦退灘灘露沙虛岸岸頽澗聲穿竹去雲影過山來柳
茵粘枝住桑花共葉開菴廬少來往門巷濕蒼苔

清明日狸渡道中

灑灑沾巾雨披披側帽風花燃山色裏柳卧水聲中石
馬立當道紙鳶鳴半空墻間人散後烏鳥正西東

寒食客中有懷

江郭花開也寂寥不須綠暗與紅凋疾風甚雨過寒食
白日青春吟大招芳景尚隨流水去故人應作綵雲飄
煙波千里家何在惟有溪聲似晚潮

南塘寒食書事

堧外新陂綠岡頭宿燒紅裏魚蒸菜把饋鴨鎖筠籠酒
侶晨相命歌場夜不空土風并節物不與故鄉同

白日青周德萬攜孥赴龍舒法曹道過水陽相見留別

女弟

草草相逢小駐船一杯和淚飲江天妹孤忍使行千里
兄老那堪別數年馬轉不容吾悵望櫓鳴肯爲汝留連
神如相此俱強健綠髮歸來慰眼前

高淳道中

路入高淳麥更深草泥霑潤馬駸駸雨歸隴首雲凝黛
日漏山腰石滲金老柳不春花自蔓古祠無壁樹空陰
一簞定屬前村店袞袞炊煙起竹林

夜至寧菴見壁間端禮昆仲倡和明日將去次

其韻

杉松廡門森老蒼佛屋深夜幡花香借牀睡倒恍何處
夢隨潛魚聽驚榔啞禽語曉光淨窻草鳴朝雨涼
哦詩出門懷二妙春漲繞山湖水黃

行唐村平野晴色妍甚

煖日烘繁梅穠香撲征鞅雲煙釀春色心目兩駘蕩柳
眉翠已埽桑眼青未放茲遊定不俗前路八千嶂

嶺上紅梅

霧雨臙脂照松竹江南春風一枝足滿城桃李各嫣然
寂莫傾城在空谷城中誰解惜娉婷遊子路傍空復情

花不能言客無語日暮清愁相對生

浙東參政寄示會稽蓬萊閣詩軸次韻寄題二

首

仙翁來佩玉符麟綠髮無霜照碧筠永夜闌干千嶂月
清風揮塵七州春塵埃不隔壺中境功業猶關物外身
鸞鶴莫驚兵衛峻主人元是白雲人

鰲背飛來紺碧浮人間還有小蓬丘不須擊水三千里
已壓中天十二樓羽駕舊曾將夢到芝田今合爲公秋
玉霄有客方東望竟欲乘風馭氣遊

外舅輓詞二首

植德千章茂劘材百鍊剛事功纔止此物理故難量鴈

序雲天遠蘭階雨露芳公無憾身後人自惜堂堂
幽介聯昏援門闕閱歲更方欣承燕几何意寫銘旌笑
語猶尋夢恩勤已隔生情傷到深處有淚不勝傾

天平先隴道中時將赴新安掾

霜橋冰澗淨無塵竹塢梅溪未放春百疊海山鄉夢熟
三年江路旅愁生松楸永寄孤窮淚泉石終收漫浪身
好住鄰翁各安健歸來相訪說情真

元夕泊舟霅川

蓮炬光中月自圓人情草草競華年最憐一夜旗亭鼓
能共鐘聲到客船

桐川郡圃梅極盛皆圍抱高木浙中無有

家住丹楓白葦林橫枝一笑萬黃金玉溪園裏逢千樹
還盡春風未足心

牧馬山道中

土橋茅屋兩三家竹裏鳴泉漱白沙春色惱人無畔岸
亂飄風袖拂梅花

宿牧馬山勝果寺

佛燈已暗還吐旅枕纔安却驚月色看成曉色溪聲聽
作松聲

游寧國奉聖寺

松梢臺殿鬱高標山轉溪迴一水朝不惜褰裳呼小渡
夜來春漲失浮橋

自寧國溪行至宣城舟人云凡百八十灘
波驚石險夜喧雷曉泊旗亭笑眼開休問行人緣底瘦
適從百八十灘來

次韻宣州西園二首

苔茵無地着紅塵花草含芳一笑新不待東君能剪刻
相公筆力挽回春
星芒垂耀筆牀寒河漢波流硯滴乾
棐几松跗入三昧
一篇詩就一杯殘

晚步西園

料峭輕寒結晚陰飛花院落怨春深
吹開紅紫還吹落
一種東風兩樣心

送端言

東君留戀一分春
蜂蝶闌珊燕子新
桃李無情空綠徑
市橋楊柳送行人

早發竹下

結束晨裝破小寒
跨鞍聊得散疲頑
行衝薄薄輕輕霧
看放重重疊疊山
碧穗吹煙當樹直
綠紋溪水趁橋彎
清禽百轉似迎客
正在有情無思間

小澗

石礙珠旒濺灘平
霧縠鋪小童能好事
繫馬斲菖蒲

次韻子文探梅水西春
已深猶未開水西謂歙
溪而黃君謨州學記云
頻江地卑蓋此水爲浙

之源正可謂之江也

孤山山下小斜橋客魂曾共暗香飄五年不踏西湖路
想見黃昏清淺處如今憔悴古江干豈有幽芳伴倚欄
臘盡雪殘春不至坐令愁裏眼長寒霜稜未貸千林槁
門外風饕人欲倒斟酌芳心正怯寒有情真被無情惱

後催租行

老父田荒秋雨裏舊時高岸今江水傭耕猶自抱長飢
的知無力輸租米自從鄉官新上來黃紙放盡白紙催
賣衣得錢都納却病骨雖寒聊免縛去年衣盡到家口
大女臨岐兩分首今年次女已行媒亦復驅將換升斗
室中更有第三女明年不怕催租苦

次韻子文衝雨迓使者道聞子規

夢魂翔蜨翅鼻息吼鼉鼓喚起治曉裝馬嘶童僕語汨
泥溷鳧鶩慚愧黃鵠舉猥吟陬隅池浪廢枯棹圃啼鵲
撩客心鈎引着何許請歌蘇仙詞歸耕一犁雨

奉題胡宗偉推官攬秀堂

城外屏峰雲百疊城裏看雲笏柱頰山靈自與人爭秀
明滅煙霏難應接南鄰范叔骨相寒不如騎曹知愛山
晨霞儻可救枵腹丐君分我入朝餐

次韻太守出郊

曉裝緹騎踏芳辰江爲安瀾露浥塵檠戟前驅留住月
笙簫後備帶行春魚龍水面金杯滿鸞鶴山頭綵筆新

聞道將軍寬禮數不辭醕酌吐車茵

曉出古巖呈宗偉子文

曉風生小寒嵐潤裊巾屨宿雲埋樹黑奔溪轉山怒東方動光彩晃晃金鉦吐千峰森隱現一氣澹回互平生癖幽討解后飽新遇那知塵滿甑晨炊午未具不愧忍飢面來尋古巖路稻粱亦易謀烟霞乃難瘠持此慰龜腸搜枯尚能句

積雨蒸潤體中不佳頗思故居之樂戲書呈子

文

門外泥深蘸馬鞍墨雲未放四維寬前山忽接後山暗暑雨全如秋雨寒夢裏江湖三歎息醉中天地一憑闌

斗升留滯休惆悵
枳棘從來著鳳鸞

簽廳夜歸用前韻呈子文

簿書堆裏解歸鞍
我亦蕭然轡勒寬
爐篆無風香霧直
庭柯有月露光寒
閒思喜鵲填河鼓
靜數流螢繞井欄
明日又驅官裏去
從教白鷺侶紅鸞

聖集誇說少年俊遊用韻記其語戲之

京塵紅軟撲雕鞍
年少王孫酒量寬
倚袖竹風憐翠薄
捧杯花露怯金寒
黃雲城上栖烏曲
綠水橋邊鬪鴨欄
別後相思惟故物
壁煤侵損扇中鸞

次溫伯用林公正劉慶充倡和韻

前山後山梅子雨
屯雲日夜相吞吐
長林絕壑望不到

時有樵歸說逢虎奔溪朝來忽怒漲夾岸柳梢餘尺許
屋頭未放濃嵐散苦憶清風汎瓊宇客行落此亂山中
但欲尋人訴羈旅比鄰解后得清士睂宇津津佳笑語
杯行起舞出新句我氣已衰聊復鼓明年與君杭太湖
扁舟踏浪不踏土沉沉玉柱闕仙扁矯矯虹梁浮水府
目力無窮天不盡却笑向來誰縛汝

次韻温伯夜坐今日忽得舍弟到杭消息喜見

於詞

長風吹月來影碎竹間牖良宵坐窘東媿我塵外友平
生煙霞興碑兀上南斗頗亦契三三未省計九九迷塗
入簿領鄉心幾回首嗟予季行役舟拂漲溪柳凌晨雙

鵲鳴翫占得無咎何當從汝去履綦尋蕙畝

再次韻呈宗偉溫伯

官居數椽間局促如瓮牖幸鄰詩酒社金薤對玉友真

清廊廟器偉望配山斗

宗偉自號真清居士

行當侍紫極槐棘位

三九館舍有竒士

謂溫伯

高文粲參首倡酬猥及我雙松

壓孤柳生活從冷淡幸免譽與咎相從結此夏何異歸

隴畝

次韻溫伯納涼

日斜猶畏暑吏退合偷閒霞散紅綃薄溪迴碧玉彎伴
人惟羽扇娛客欠風鬟且復哦新句相嘲飯顆山

雨涼二首呈宗偉

誰扶病客起龍鍾
恩在盆傾一雨中
問訊九關何路到
擬牋歡喜謝天公

驚雷隱地送涼颼
起舞看山不自持
說與騷人須早計
片雲催雨雨催詩

明日復雨涼再用韻二首

東山朝日澹冥濛
一片雲生萬疊中
宿雨未蘇焦卷盡
又煩箕井喚雷公

濺瓦排檐散萬絲
顛狂風篠要扶持
恩深到骨吾能報
急賦新涼第一詩

次韻慶充避暑水西寺

佳晨出西郭
仰視天宇清
樂哉曠士懷
浩浩吞四溟
新

漲忽勇退籬落粘枯萍風幡招客遊曠望隔蘋汀僕夫
屬清深竹輿竦亭亭波翻石鑿落尚帶蛟龍腥華堂入
松竹德人占聚星脫帽飛羽觴頽放解天刑時當行火
令草腐亦化螢炎官紛陸梁空飛赤雲輶遙知隴上耘
暴背愁白丁茲遊豈易得未用歎沉冥

送滕子昭績溪罷歸

天馬西極來目力盡九寰執轡者誰歟墮此空谷間草
深石齧足一躍度孱顏長風送逸駕蕩蕩登虎關五雲
清都上白日開帝閑鈞陳動光彩球琳鏘轡環亦復念
舊羣依然歎駑頑紅塵起天末可望不可攀

石湖居士詩集卷五

石湖居士詩集卷六

次韻溫伯謀歸

官路驅馳易折肱官曹隨處是愁城隨風片葉鄉心動
過雨千峰病眼明一轡何須嘗世味寸田久已廢吾耕
羨君早作歸歟計屈指從今幾合并

次韻溫伯雨涼感懷

窮士病且飢古今同一流身安腹果然此外吾何求判
司誠卑官未免塵甑憂窮山更瘴暑憊卧不舉頭二物
交寇我生世真如浮晨朝墨雲作疾雷破山丘排檐忽
飛溜蛙蝮鳴相酬朱冠領熱屬橫潰輸一籌新涼蘇肺
氣踏濕登城樓好邀雲雨仙長袖按梁州吹水添瓶罍

淨洗千斛愁何從有此段冰廳冷如秋但覺詩思生爽
氣入銀鈎章成竟何用知能救窮不湯子亦旅食回望
家還羞倡子敢不和共作商聲謳

次韻子文雨後思歸

斷雲將雨洗松篁昨夜癡龍起蟄藏人自無情孤樂事
天猶有意作新涼尊前不見凌波襪樓下空聞拜月香
萬事安能盡如願且來相伴壓糟牀

次韻溫伯苦蚊

白鳥營營夜苦飢不堪薰燎出窓扉小蟲與我同憂患
口腹驅來敢倦飛

慶充自黃山歸索其道中詩書一絕問之

鳴騶如電馬如雷
知是婆婆醉尉迴
常日錦囊猶有句
況從三十六峰來

曉出古城山

落月墮眇莽殘星澹微茫
竹輿亂清溪飛蓋入嵐光
松檜霧靄濕桑麻風露香
空翠滴塵纓何必濯滄浪
山家亦早作迨此朝氣涼
林深無人聲木末炊煙蒼
離離瓜芋區肅肅棗栗場
田園古云樂令我思故鄉
墟市稍來集筠籠轉山忙
吏事亦挽我歸路盤朝陽

李深之西尉同年談吳興風物再用古城韻

李侯昔遊吳蓮舟鏡蒼茫
風鬟與霧髻共濯玻璃光
采花不盈舫日暮雲水香
還登縹緲樓羅襟酒淋浪
卷箔

納星月踏筵按伊梁安知有恨事但恐蒹葭蒼風吹落
窮谷草深麋鹿場高罔苦炎熱游子悲異鄉尚喜簡書
省期會無忽忙猶餘作詩苦消瘦如東陽

葉茂齋七月五日夜雨快晴

豐隆坎坎夜伐鼓靈湫老龍撇波舞寒雲掣電上清空
倒捲天潢作飛雨向來炎官作夏旱萬里彤霞烘玉宇
豈惟牛馬困蚊蟲壠上行人口生土我從雪浪葉舟來
不謂山城熱如許天公知我愁欲病施與一涼蘇逆旅
稍聞水繞屋除鳴不覺星從雲罅吐千山濯濯淨鬢髻
缺月娟娟炯眉嫵浮生此景萬事足但欠清歌對芳醕
天上秋期正多事趣駕星橋跨銀渚人間四者自難并

莫妒黃姑迎織女

次韻宗偉溫伯

冉冉流光迫歲餘
青林日夜向人踈
雨滋巖桂重堆粟

新安木犀
秋暮再花

風折庭蕉又獻書
逋客解蘭思
婉婉先生彈

缺厭清虛一塵不立
渾輸我即境心安是故廬

宗偉新
議婚溫

伯病起無聊故有
解蘭彈缺之語

再韻答子文

浮生飽外莫求餘
羈旅東來計已踈
肩聳已高猶索句
眼明無用且繙書
百年子莫占元緒
萬法吾今付子虛
惟有登臨心未厭
黃山聞道勝衡廬

道見蓼花

秋風裊裊露華鮮去歲如今刺釣船歎縣門西見紅蓼
此身曾在白鷗前

次韻溫伯種蘭

靈均墮荒寒采采紉蘭手九畹不留客高丘一回首崢
嶸路孔棘悽愴肘生柳遂令此粲者永與窮愁友不如
湯子遠情事只詩酒但知愛國香此外付烏有栽培帶
苔蘚披拂護塵垢孤芳亦有遇洒濯居座右君看深林
下埋沒隨藜莠

次韻子文

幻塵久已破狐涎身世誰能料鼠肝暮夜雨收千嶂出
晨朝風卷四維寬我今無事不如夢君豈有心猶覓安

但促小槽添壓石龍頭珠滴夜珊珊

次韻知郡安撫九日南樓宴集三首

雙旌暮捲小春容畫棟雲生笑語中
但覺山光侵酒綠不知日脚染溪紅
控臨縹緲疑無地指點虛無欲馭風
誰遣玉蟾催騎吹歸來人影在朦朧

珠履參陪北海觴仍邀擁節舊中郎
碧城香霧連天暝黃葉霜風捲地涼
佳節轉頭論聚散清波從古閱興亡
明年重把茱萸醉公在叢霄貢玉堂

斯民鄒魯更豐年雅道淒涼見此賢
萬隴登禾新霽色千村鳴柝舊寒煙
鏘金絕世詩情妙倚劔凌空隸墨鮮

太守新題南樓榜

珍重北窓山六六使君名與汝俱傳

晚集南樓

浪隨兒女怨萍蓬，笑拍闌干萬事空。
宇宙勲名無骨相，江山得句有神功。
掉頭莫覩秋高鷲，留眼來賓日暮鴻。
懶拙已成三昧解，此生還證一圓通。

賞雪騎鯨軒子文夜歸酒渴侍兒薦茗飲蜜漿
明日以詫同遊戲爲書事邀宗偉同作

溪山四時佳，今日更竒絕。
天公妙莊嚴，施此一川雪。
飛花浩如海，眩轉塞空闊。
水西萬珠樹，玉塔照銀闕。
碧溪不受凍，長灘瀉清咽。
漁舟晚猶汎，樵檐寒未歇。
懸知畫不到，未省詩能說。
歸來強搜句，冰硯冷於鐵。
不知嚴夫子，迎門生煖熱。
梅香不可耐，梅即侍兒小名但覺酒腸竭。
蜜融

花氣動茶泛乳膏發寧辭春筍寒爲暖花瓊滑曹騰畫
屏暖喚起眼餘纈笑我獨何事作此淡生活想像高唐
賦何如徑排闥

從聖集乞黃巖魚鮓

截玉凝膏膩白點酥粘粟輕紅千里來從何處想看船
浪帆風

從宗偉乞冬筍山藥

竹塢撥沙犀頂銳藥畦粘土玉肌豐裹芽束緼能分似
政及菜蕪甑釜空

雪後守之家梅未開呈宗偉

瓦溝凍殘雪檐溜粘輕冰破寒一竿日春隨人意生端

葉再三白南枝尚含情定知司花女未肯嫁娉婷官居
苦無賴一笑如河清落木露荒山寒溪繞孤城朝暮何
所見雲黃叫飢鷹東風不早計愁眼何當明北鄰小橫
斜蘚地可班荆憑君趣花信把酒撼瓊英

次韻溫伯城上

閉戶成癡坐扶藜得意行樓臺浮霽色市井碎春聲雪
盡小橋出煙消千嶂生病多無脚力遙羨落鴻輕

知郡安撫以立春日揭所書新安郡榜南樓之
上曉雪紛集邦人以爲善祥遂開宴以落之輒
賦長句一篇以附風謠之末

碧瓦朱甍上牛斗妙墨新題森鎖鈕使君筆力挽春來

一夜飛花暗梅柳南山與樓相對高向來千載爭雄豪
八分三字一彈壓衆峰戢戢如兒曹人間盛事天不隔
急催此雪成三白未論千古福邦人先卜明年滿岡麥
東風酒面吹凝酥不辭醉倒歸相扶短歌萬一傳樂府
湛輩亦與公名俱

次韻知郡安撫元夕賞倅廳紅梅三首

春入林梢一再風破寒勻染費天工雖然媚蕩新粧別
只與橫斜舊格同午枕乍醒鉛粉退曉奩初罷蠟脂融
後來顏色休論似夾路漫山取次紅

真色生香絕世逢煙光池面雨溶溶楚鄰不待施朱好
號國翻嫌傅粉濃晴日曖雲春照耀溫風霽月夜春容

酒闌且駐紗籠看慢破團團一壁龍

司花一笑爲誰開知道朱幡得得來
踈影有情當洞戶
薦香無語墮空杯
風生翰墨留連看
月入笙歌次第催
來歲如今翻舊唱
五雲叢裏望三台

新安絕少紅梅惟倅廳特盛通判朝議召幕僚
賞之坐皆有詩亦賦古風一首

華燈收盡江梅落別有橫枝照林薄
天教閭苑染芳根
小住山城慰蕭索
騰騰醉後酒紅醺
淡淡粧成笑靨新
斟酌東君已傾倒
爲渠都費十分春
別乘胸懷有風月
催喚清尊洗愁絕
花知主客得不凡
一夜光風融絳雪
樓頭煙暝吹單于
花梢挂星光有無
歸來境熟落春夢

夢入鎖香紅綺疏

胡宗偉罷官改秩舉將不及格往謁金陵丹陽諸使者遂朝行在頗有倦游之歎作詩送之

凍雲埋山天冥濛北風無情雪塞空道傍人稀鳥飛絕
問君東遊何怱怱君言薄官淡無味免俗未能聊復爾
我評茲事一鴻毛因行且看佳山水陵陽樓閣壓高城

煙屏百疊雙流橫

宣城疊嶂樓雙溪閣

姑孰江亭更竒絕濃黛兩

抹長眉青

當塗蛾眉亭望東西梁山如雙眉

山形成龍復成虎六代遺

蹤供弔古

謂金陵鍾山石頭

大荒莽蒼江水黃雨淚風煙眇吳

楚

賞心亭雨花臺所見

却浮一葦下長川浮玉低昂波聒天

長蘆真州

寺浮玉山也

梁溪南岸小停櫓一酌人間第二泉

無錫惠山陸子

泉閶門峨峨過吾國

姑蘇僕故里閶門北門也

姑蘇臨波照金碧太

湖三萬六千頃上有垂虹跨南極

吳江長橋三高亭鴟夷子在焉

我家

越相尚神遊試從煙浪訪扁舟問訊白鷗相記否謂言

久客不勝愁軟紅三尺長安道九重城闕乾坤繞西湖

山寺浙江樓君昔曾遊今更好故人客館中天開非君

誰上黃金臺挽着天衢五雲上却望江湖如夢迴萬境

何如一丘壑幾時定解冠裳縛幔亭山下桂叢深清社

向來都寂莫

幔亭清社皆宗偉舊隱故事

黃伯益官舍賞梅

一杯何處洗愁顏黃法曹家玉樹寒翠袖撚香留客看

春風都在小闌干

次韻朱嚴州從李徽州乞牡丹三首

佳人絕世墮空谷，破恨解顏春亦來。
莫對溪山話京洛，碧雲西北漲黃埃。

歛浦煙山蟠萬疊，釣臺雲日擁千章。
兩侯好事洗寒寶檻，移春入燕香。

閨風苑裏司花女，肯作山腰水尾來。
十二玉欄天一笑，只今歸路五雲開。

時傳使君有召命

送琴客許揚歸永嘉

烏帽休衝九陌埃，瘦藤定約到秋迴。
龍湫鴈蕩經行處，斷取松風萬壑來。

送李徽州赴湖北漕

徂徠千丈松閱世聳絕壁高標上霄漢峻節貫金石惟
有孤生竹亭亭附微植月夜借清景春朝分秀色託根
未渠央萬牛挽山澤昂藏轉江湖夷路入王國明堂五
雲上一柱屹天極可望不可攀清都與塵隔依然此清
士空山淡愁閒悲吟發清籟搖蕩風雨夕

送通守林彥強寺丞還朝

鴈蕩之山天下無奔岸絕壑不可圖地靈境秀有人物
新安府丞今第一紛綸草木變暄寒竹節松心故凜然
窮山薄宦我無恨識公大勝荊州韓梅風漲溪綠如酒
曉插檣烏上南斗只今廣廈論唐虞斟酌正須醫國手
秀眉津津雙頰丹想看鳴佩翔九關諸公倘欲持公議

莫遣此賢思故山

送温伯歸福唐納婦且約復游雪川

攬秀堂前一笑傾都忘身世兩浮萍扶藜處處從君賞
落筆時時得我驚荔熟閩山勞夢想蘋香茗水約逢迎
祇愁誤入桃源後從此車輪四角生

次韻宗偉閱番樂

十日間愁晝掩闕起尋一笑共清歡罷休詩社工夫淡
洗淨書生氣味酸盡遣餘錢付桑落莫隨短夢到槐安
繡鞞畫鼓留花住賸舞春風小契丹

題漫齋壁

漢陰無械可容機歲晚功名一衲衣槁木間身隨念懶

浮雲幻事轉頭非
三彭已罷庚申守
五鬼從教乙丑歸
富貴神仙兩俱累
此心安處是真依

四月十六日拄笏亭偶題

轉午聞雞日正長
小亭方丈納空光
綠陰一雨濃如黛
何處風來百種香

次韻即席

留連銀燭照金荷
腸斷華年一擲梭
月姊有情難獨夜
天孫無賴早斜河
晶晶霜瓦寒生粟
袞袞風幃細湧波
鵲鵲曉啼鳴鵲散
許多佳景奈愁何

五月聞鶯二首

桑陰淨盡麥頭齊
江上聞鶯每歲遲
不及曉風鴨鴂子

迎春啼到送春時

一聲初上最高枝
忙殺嘔啞百舌兒
老盡西園千樹綠
却憐槐眼正迷離

知郡檢計齋醮禱雨登時感通輒賦古風以附

輿頌

六月火雲高偃蹇使君有意憐焦卷
一封紅篆驛金龍
雨氣倏隨爐燎滿
風師避路雷車鳴
石破天驚檐溜傾
不知稻本頗甦否
但覺溪聲如百霆
稅駕朱旛未云久
造化功成屈伸肘
我評茲事與天通知
公小試調元手
清壇深夜賓衆真
前驅霓旌後鸞輪
定有靈官識仙伯
報道紫皇思侍臣

